

Estd 1986

AGAPE

Vol. XXVIII No. 264

JUNE 2014



Ringtute tih tur - Kristian Chhngkaw din

Phek 2-na

Pentikos ni leh Thlarau Thianghlim

Phek 5-na

Kristian Chhngkua ♦ Sermon ♦ Article ♦ Ei siam dan

Lak man	:	Kum khatah	₹	60.00
		Copy khat	₹	5.00

EDITORIAL BOARD

<i>Editor</i>	:	<i>Lalfakmawii</i>
<i>Joint Editors</i>	:	<i>C. Lalneihthangi Lalrindiki</i>
<i>Circulation Manager</i>	:	<i>H. Lalpianthangi</i>
<i>Member-te</i>	:	<i>1. Rosangpuii 2. Parchhuaki 3. Sailuti 4. Vanrammawii 5. Rev. K. Lalpiangthara</i>
<i>Publisher</i>	:	<i>Rev. Lalramliana Pachuau</i>
<i>Agape Phone No.</i>	:	<i>0389-2326372</i>
<i>email :</i>		<i>0389-2301824 (Heng number-ah hian office hun chhungin biak theih a ni.)</i>
<i>agapechanchinbu@gmail.com</i>		<i>0389-2322285</i>

A chhunga thu awmte

- | | | |
|--|---|----|
| 1. Editorial | - | 1 |
| 2. Kristian chungkua : Ringtute tih tur - Kristian chungkaw din | - | 2 |
| 3. Sermon : Pentikos ni leh Thlarau Thianghlim | - | 5 |
| 4. Sual huatna Thlarau Thianghlim | - | 9 |
| 5. Thlarau Thianghlim thlamuantu | - | 14 |
| 6. Thlen chin aṅanga hmasawn | - | 19 |
| 7. Phai lama fa dah turte tana thurawn | - | 23 |
| 8. Hmangaihna In tana thilpekte | - | 26 |
| 9. Lalpa remruat | - | 28 |
| 10. Ei siam dan : Chicken corn soup | - | 29 |
| 11. Hruaitute chanchin | - | 30 |
| 12. Hriat atan | - | 31 |

Editorial

Kohhran Hmeichhe Rorel Inkhawm wawi 7-na Durtlang Biak ina neih chuan Kohhran Hmeichhiate Project lian tak – Women Center sakna tur hian Bial tinte thawh tur budget a siam a.

Women Centre dinna atana kan thawh hona leh tan kan laknate hi a ropui hle. Kohhran Hmeichhe member tinin kut kan thlak a, kan ni khat hlawh/tha ai kan thawh a. Kohhran tinin inkhawm thawh lawmte kan chung khawm baw a. Heng bakah hian mi inphalten an chungte hriat reng nan sum thahnem tak tak an thawh baw a, heng avang hian kar lovah sum thahnem tak a tling khawm thei hi a lawmawm tak zet a ni. Heng avang ngawt pawh hian Pathianin Women Centre din hi a remti tih a lang. Tunah chuan a in sak hna pawh hi an zo har tawh lovin a rinawm a. Thui tak sak tawh ni mah se, zo fela, hman theih meuh tur chuan hmabak a la tam hle dawn a ni.

Mizo upain ‘*In sak pum hian a zat ve kan zo chauh a ni*’ an tih ang deuhvin, tha thlah lova kan tan zel a ngai dawn a. Tun tuma bial tinten kan budget pawh hi kan theih ang tawkin ngah tum ila, kan tlin thei ta lo a nih pawhin kan la buaipui zel tur tho a ni tih hriain inthlahrung lovin kan tlin ang ang chu pe khawm ila. Kan theih tawka kan beiha, kan thawh chhuah chu Lalpan mal a sawm ang a, chu chuan hna nasa takin a thawk tho ang tihte pawh ring ila a tha ang e.

*Kristian Chhungkua***RINGTUTE TIH TUR - KRISTIAN CHHUNGKAW
DIN (1 Tim 2:15)**

- *Upa C. Lalengzauva
W. Phaileng*

Tirhkoh Paula hian Kristian chhungkua ðha tak din pawimawh thu ziaak a tam viau mai a. Ringtu chu kawng tinrenga ngaihtuahna hmanga hma la tur kan ni a, mihring tak chuan kan tling lo a ni tih hi a lang Chiang ðhin khawp mai. Mahse, ðan kan lak zel a ðul bawk si a. Chuvangin, rilru a lo lang thu tlem ka rawn ziaak ve a ni.

Ngaihtuahna hetiang hian han siam ta ila -

1. Chhungkaw awmzia kan hriat chian a ðul. Chhungkua hi Pathianin he leia kan khawsak dan tura min dinsak a ni tlat. Mak deuh mai chu - Hmeichhiaten pasal an nei a, an pasalte chu mi hrang daih, la hriat chian loh te, ðhenkhat pheii chu khaw lam hla tak taka mite ni mah se lungawi taka an va nei thei hi a ni, mipa pawh chutiang thovah ngai ila. Hetiang tih theihna hi Pathian hnathawh, mihring rilrua a dah tlat chu a ni.

Chhungkaw dinna atana mipa leh hmeichhe inhip tawanna min pekte hi Pathian

hnathawh a ni a. Pathian hian kan chhungkuaa tel ve a duh tlat a ni. Pathian hnam thlante kan la inti deuh deuh lehngal a, ngun deuhvin i ngaihtuah nawn ðhin ang u.

2. Mi thiamte chuan, kum zabi 21-naah hian Naupang enkawl uluk pawimawhzia an hmu chhuak thar e an ti a, a chhan ber nia an sawi pawh, “Khawvel thilin chhungkaw tin mai hi a chim nasat vang a ni,” an ti.

Rualawhna te, mahni hmasialna te, nawmchen duhna te, khawsak sanna lamah te, thiamna lamah te kan tlan nasa em em a, heng avang hian fanau enkawl hi

kan thlahdah a, Lal Isua rinna leh amah anna kawnga hruai kan tum lo va, chu chu chhungkaw tam ber hian kan tuar ta niin a lang. Nu leh pate hian, fanaute hi Lalpa laka kan rochan an ni a, rila rah hi a lawmman min pek a ni tih i hre thar ang u.

Kan ramah hian nawmchen chakna te, sum duhna te, zalen duhna te a nasa hle mai, heng hi nu leh pain kan fate kan ngaihsak dan a dik loh vangte a ni ang. Kristian ramah hian thil mak tak tak - hmeichhia leh hmeichhia inngaizawnga innei te, mipa leh mipa inngai-zawnga innei te, Pathian aia Setana bia te kan awm ta hial mai, a va rapthlak em!

Edger Hoover-a chuan “Vawiina naupang mizia kan chher that loh chuan, naktuk atan sualna hriamhrei kan chher tihna a ni,” a ti. Kan fate hi Lal Isua i pe ang u. An thlarau nun hi kan enkawl tur tak chu a ni. Fate thlarau lam nun thatna tur vei pha lo nu leh pa reng kan tamin a lang. Nu leh pate hian kan fate chungah mawh kan phur

nasa a ni tih kan hriat chian chuan, kan fate nungchang a chhe lutuk thei lo an ti. Fa neih ringawta enkawl that leh loh hi a pawl a ni.

Lalpa laka kan rochan, “*Lalpan min pek a ni*” tih hi kan hre chiang tur a ni. Dik tak chuan kan fate bak hi vanramah pawh kan chhawm thei lo, kan faten Lal Isua an nei lo a nih pheh chuan chhungkua hi kan la inthen darh nuai mai ang.

3. Kan Pathian hian amaha inngat chhungkua ni turin min duh a. Johana 4:3-ah ‘tih tak zeta chibai buku tur Lalpan a zawng’ tih kan hmu. Chhungkaw tin hian tih tak zetin Lalpa chibai i buk thin ang u, ‘Keimah lo chu Pathian dang nei suh’ a ti si a. Lotate chhungkua ang mai khan, Sodom khaw ngai hian dam chung khawsak lungkhamna um hian kan kur rei lutuk ang a, vantirhkohte hnuh chhuah ngai khawp hian kan awm ve palh ang e. Kohhrana mi thahnem ngaiten an nawr pawha, nawr chhuah theih loh chhungkua kan la nih fo chuan kan inhriat chhuah hun

a tlai ngei ang.

Mi hausa pawh kha hremhmunah a harh ve chauh kha a ni a, a pawh khawp mai. Nun min petu hre chang lo hian kan rilru zawng zawng, kan chakna zawng zawng, kan thlarau zawng zawng hian dam chung khawsaknate hi kan um palh ang e.

Kan Lal Isuan, 'Eng nge ka ei ang' emaw, 'Eng nge ka in ang?' emaw, 'Eng sinin nge kan awm ang, tih lungkham suh u. A ram leh a

felna chu zawng hmasa zawk rawh u, tichuan, chung zawng zawng chu a pek belhchah dawn che u nia,' a tih kha.

Pathian vanga kan chhungkaw khawsakin a lo tuar ta deuh a nih pawhin pawh i ti lo ang u. Lalpaa innghat chhungkua tluka chhungkaw itawm leh nuam a awm lo va. Chhungkaw kehchhia pawh an awm ve ngai lo. An chhungkaw lalber chu Pathian a nih tlat avangin.



Pastor fapa, naupang fel tak hi a hrisel lo hle a; doctor-ten kawng hrang hranga an endik hnu chuan a dam rei tawh dawn lo tih an hre chhuak ta tlat mai a. Pastor chuan a fapa chu Pathian ring tlattu a ni tih a hriat avangin a thih pawhin vanram a thleng ngei dawn tih chu a hre chiang hle a; nimahsela, a fapa hnena hriattir dan tur erawh chu thil harsa tak a ni ta! Theihtawp chhuaha Thlarau Thianghlim tanpuina a dil hnuin damdawi ina a fapa khum bulah chuan a ding a, Pathian Thu chhiarin a fapa nen chuan an tanngtai dun phawt a. A dam rei tawh dawn lo tih doctor-te sawi chu hrihl pahin, "Mama, Isua Krista hnena han awm chu i huphurh em?" tiin a zawt zui a. A fapa chuan huaisen tak maiin a mittui a hru fai a, "Ka pa, nangmah ang hi a nih chuan ka huphurh teuh lo mai," a ti a.

*Sermon***PENTIKOS NI LEH THLARAU THIANGHLIM**
(*Tirh 2:1-12*)

- Rev. C. Lianzuala
Vaivakawn

Pentikos hi ‘sawmgana’ tihna a ni a, Kalhlên Kût aṅga chhiara ni 50-na a ni. Chumi ni chuan Juda-ten Pentikos Kût an hmang ṭhin (Lev 23:16). Mizoten Kûtpui pathum Chapchâr Kût, Mîm Kût leh Pâwl Kût kan nei ang bawk hian Juda-te pawh khan Kûtpui pathum Kalhlên Kût, Pentikost Kût leh Bâwkte Kût te hi an nei a. Pentikos Kût phei hi chu Hapta Kût, Buh seng Kût, Buh thar tirh Kût ti tein an sawi bawk ṭhin (Ex 34:22; Deut 16:10). April thla laihawl velah Kalhlen Kût hi an nei ṭhin a, Pentikos Kût hi chu June thla bul lamah an nei ṭhin.

He Pentikos Kût ni hi a lo thlenin Jerusalemah Thlarau Thianghlim ropui takin a lo thleng a. Keini Kristiante pawhin Isua thawhleh ni (Easter Sunday) aṅga chhiara ni 50-naah Pentikos Ni hi kan hmang ta zel a ni. Mak tak leh ropui taka Thlarau Thianghlim lo thlen ni a nih avangin Kristiante chuan he ni hi kan ngaisang em em a ni.

He Pentikos niah hian Isua zirtir 11, Isua nu Mari, Isua unaute leh hmeichhia tute emaw nen Jerusalem-a in pakhat pindan chungnungah

an awm khawm a. An vai chuan mi 120 lai an tling a. Heta an awm khawmna pindan hi a thih hma zana Isuan a zirtirte zanriah hnukung a kilpuina hmun kha a nih rin a ni. Heta an awm khawm lai hian mak tak maiin Thlarau Thianghlim a lo thleng phut mai a. An chungah Thlarau Thianghlim lo thlen dan kha hetiang hi a ni:

Van ata ri: Ri nasa tak mai a lo thleng phut mai a. Chu ri chu tawtawrawt ri emaw, dar ri emaw, khuang ri emaw, khawpui ri emaw ang ni lo,

thlipui tleh ri ang, ri vut vut ang hi a ni ang.

Van ata: Chu thawm ri vut vut chu chhim lam emaw, hmar lam emaw, chhak lam leh thlang lam emaw aṅanga lo kal ni lovin, van lam, an lu chung lam aṅanga lo kal a ni. Chung lam van sang tak aṅanga a chhuk zawnga lo kal ni awm tak a ni a, a mak awm hle mai.

Thawk leh khatah a lo thleng phut a: Thlipui tleh ri leh ri dang tam takte hi chu a tirah zawi leh muang deuhvin a lo ri a, zawi zawiin a ri nasa tual tual ṭhin. Pentikos Ni-a van ata thlipui tleh thawm ri ang maia lo thleng hi chu chutiang chu ni lovin thawk leh khatah a lo thleng phut mai a, pindan chhunga lo awmte chu a barakhaih nasa ngawt ang.

An ṭhutna in chu a tikhat ta vek a: Chutia thlipui thawm ang ri lo thleng phut mai chu an ṭhutna pindanah chuan a khat ta tlat mai a. Thawm ri dang reng reng chu hriat theih a ni tawh lo vang. Riin pindan a luah khat tlat mai tur chu a buaithlak hle

ang a, beng ṭha vak lo neite pheĩ chuan an beng an hup fe a ngai ang.

Mei alh: Chutih lai chuan meialh a lo awm leh a. Chu meialh chu lei ang maia insiamin a insem darh a, an lu chungah a fu ta thluah mai a. Hetih lai hian an zinga mi pakhatin a bula awmte hnenah, “In lu chungah mei alh a awm e, in hai thlak thuai loh chuan in lu a kang mai ang,” tiin hrilh ta sela, anni chuan, “I lu chungah pawh a awm ve tho, hai thla thuai rawh,” an tih ve tho a rinawm.

Ṭawng danga ṭawng: Thil mak tak mai lo awm leh chu ṭawng danga an ṭawng kha a ni. Phuah chawpa ṭawng an ni lo va, thlarauvin a ṭawngtir ang zela ṭawng an ni. Khatia ṭawng danga an ṭawng ta mai kha a mak hle mai. Tun hma lam, Thuthlung Hlui hun zawng zawngah te khan Thlarau Thianghlim hnathawh avanga ṭawng danga an ṭawng ve thu hi kan hre ngai lo va. Pentikos Nia Thlarau Thianghlim lo thlen khan he thil mak tak mai hi a lo lang

tan ta a ni. Paula leh Petera ten Chanchin tha an tlangaupui lai khan Kaisari khuaah te, Ephesi khua leh Korinth khuaah te tawng-hriatloh lo thlen thu kan hmu zui zel a. Korinth khuaah ringtute zingah phei chuan tawng-hriatlohva tawng leh thusawi kha an uar zual hle niin a lang (Tirh 10:46; 19:6; 1 Kor 12:30, etc.).

Mahni tawng ang theuhva hriat theih: Phuah chawpa tawng ni lova, Thlarauvin a tawngtir ang zela tawng an nih avang chuan hmun hrang hrang atanga chuta lo kal khawmte chuan an tawng chu mahni tawng theuhvin an hre vek a, an thusawi ber pawh Pathian thiltih ropuite a ni. (Tirh 2:11)

Mak an ti a, a ngaihna an hre lo: Thlarau Thianghlim lo thlen dan kha a mak em lah tak a, a changtute lah kha tawng dangin an tawng ta daih baw si a, a ngaihna hriat pawh a har hle reng ang. Uain thar ruiah an puh ta ringawt a ni. Tun thleng hian mihring nuna Thlarau

Thianghlim lo thlen dan leh a hnathawh dan hi a makin hriat thiam a la har fo thin.

Pa leh fapa ata lo chhuak Thlarau Thianghlim: Pentikos nia Thlarau Thianghlim lo thleng kha Fapa Isua Kristan Pa Pathian hnen ata a hmuh, amah ngeiina a rawn leih a ni a (Tirh 2:33). Kohhran thurin chuan Thlarau Thianghlim chu 'Pa leh Fapa ata lo chhuak' tiin a sawi. Tin, Thlarau Thianghlim chu mi bik tute emaw tana pek ni lovin mi zawng zawng Pathianin a koh apiangte tana pek a ni.

Hrilh lawkna thu thlen famkimna: Hrilh lawkna thu dang ang bawkin Thlarau Thianghlim lo la thlen tur tur pawh hi kum B.C. 350 velah khan Zawlnei Joelan a lo puang lawk tawh a. Pentikos ni khan chu hrilh lawkna chu a lo thleng ta niin Peteran a sawi (Tirh 2:16-21). Pathian thu hi a daw ngai lo va, thiltih nei lovin a awm ngai hek lo. A hun leh hmun dik takah a lo thleng thin a ni. Hei hi

Pentikos nia Thlarau Thianghlim lo thleng hian a tifiyah hle a ni.

Penticost nia Thlarau Thianghlim lo thleng avangin Kristian kohhran a lo ding: Thlarau Thianghlim lo thlen hmaa Isua zirtirte leh zuitu dang awm khawmte kha mi 120 vel emaw chauh an ni a. Petera sermon an ngaihthlak aṅanga baptisma rawn changte kha mi sangthum lai an ni baw k a. Chu chu he leia Kristian kohhran lo pian ṅanna chu a ni ta a ni. Hei hi Pentikos nia Thlarau Thianghlim lo thleng pawimawhna lian ber a ni awm e.

Tin, Isuan a lo sawi lawk tawh ang khan Thlarau Thianghlim a lo thlen khan zirtirte khan tun hma lama an la neih ngaih loh **thliththeihna an rawn nei a**, chu chu thu hril theihna

te, dodalna karah pawh huaisen taka thusawi theihna te, thil mak tihtheihna te, mi dangte hneh theihna te kha a ni. Tin, **Isua thuhretu an nih theih phah baw k a.** Thlarau Thianghlim tel lo chuan Isua thuhretu a nih tak tak theih loh. An thusawi leh thiltihte khan Jerusalem khawpui kha a nghawr nghing dur dur a, Jerusalem pawn lam thlengin a nghawr nghing ta zel a. An thupui leh an au hla ber chu Isua thawhleh thu a ni. Khatiang khan Pentikos Nia Thlarau Thianghlim lo thlen aṅang khan khawvelah Pathian ram a lo ding a, tun thleng hian a darh zau ta zel a ni.

Thlarau Thianghlim, nang i awm chuan,
Khawvel lungngaih a nem ṅin;
Sual thlipui leh buaina ral lian mah se,
I hming fakin ka zai ang e.



Harsatna hi Pathianin ṅanpui kan ngaih hmain min lak kiansak ngai lo va. Amah kan mamawh tak zet hnuah chuan a kut a phar chhuak ṅin.

Mrs. Charles E. Cowman

SUAL HUATNA - THLARAU THIANGHLIM

(Jn 16:7-11; 2 Kor 7:9-11)

- Rev. R. Lalchangliana
Director, Synod Revival

Pentikos Pathianni hi Kohhran ni pawimawh a ni a, Sunday School nei lovin nileng programme siamin, thupui pawimawh tak tak thlangin sermon ngaihthlak a ni thin. Hemi ni hi PCI Assembly pawhin Ramthar Ni-ah a hmang a, inkhawm hun khat atan programme a siam a, thuchah chhiar tur a buatsaih a, tawngtai rualna neih a ni thin.

“Pentikos Kût” hi Juda-te Kût ropui zinga pakhat a ni. Kalhlen Kût tiak ni atanga chhiar a ni sawmnganaah an hmang thin. Lal Isua tiam angin Pentikos niah Thlarau Thianghlim chu zirtirho awm khawmte chungah a lo thleng a, khami ni atang khan zirtirte pawhin huai takin, martar pawh hlau lovin rawng an bawl ta a ni. Pentikos ni kan hman hian Pathian min pek Thlarau Thianghlim hi *Sual huatna Thlarau Thianghlim* a nihna hi kan zir thar a pawimawh hle mai. He ni hmang tura kan inbuatsaih lai hian hmana Pentikos nia zirtirhote chungah nasa taka Thlarau Thianghlim a lo thleng ang khan, kan ramah sualnate a lo kian theih nan

kohhranhote chungah *sual huatna Thlarau Thianghlima harhna* lo thleng se kan va ti em! Pentikos ni programme kan hman hian Thlarau nunah malsawmna min thlen se kan duh a ni.

Suah sualna a pung: Khawvelah leh kan ram Kristian ramah ngei sual a pun chakzia kan hria e. Sual avanga kan rum nasatzia leh kan manganzia pawh kan hria a, sawi tam a tul awm lo ve. Pathian hnam thlan Israel-te chungthuah zawlnei Jeremian, “*Ramah an thang lian...Sual lamah an thang zel a, kei mi hre lovin*” (Jer 9:3) a tih angin, sualna chi hrang hrangte chuan thingtlang kilkhawr ber thlengin min luhkhung avangin kan

mangang tak meuh hlawm a ni. Hun hnuhung a lo thleng a ni tih kan hriat theihna tura Lal Isuan chhinchhiaha min hrilh chu – *“sualna a pung ang a, mi tam zawk hmangaihna a dai ang,”* tiin (Mt 24:12). Paula pawhin hun hnuhunga mite awm dan khawlo leh nungchang tur 2 Timothea 3:1–5-ah min hrilh bawk.

Khawvel leh kan ram chhung kan thlirin tun hma zawng aiin suahsualna chi hrang hrang leh rapthlak tak tak leh awihawm loh tam tak a pung zual ta! Kan ramah ngei pawh hetiang sualnate hi a awm thei ngai ang tih pawh kan suangtuah phak ngai lohte chuan min chim ta mek a! Tun hma deuh kha chuan zu in leh zu rui thin mi tlem tein buaina an siam thin a, rukru mi tlem tein mi an tibuai thin tih mai loh chu sualna lian tham, nun tihrehawm thin sawi tur a tam lo hle. Tualthah thu phei chu sawi tur ting chuan a awm zeuh chauh thin.

Tunah chuan engkim a danglam zo ta! Khawvel hmun

danga mi, kan lo ral khat hriat thin sual chuan min luhkhung ve mek a, sualna rapthlak tak tak, pawngsual (kum tling lo nen lam), tual thah, inrawk leh insuam, inruk bo, uire, damdawi hman sual, ruih nan an hman chi hrang hrang Ganja, no. 4, methamphetamine, etc. mihringa sumdawnna, inkawp lo tur chi inkawp, etc. a tam mai. Thingtlang kilkhawr pawh an him bik ta lo.

Sual hian chhungkua leh vantlang nun honate min tihrehawma min tihbuai em avang hian Camping/Crusade te hi nei lo thei kan ni lo. Sual kan huat viau lai hian sual hnathawhna hmanrua leh hriamhrei tha ber mai pakhat Zu tihzalenna lam kan sawi mawi tlat erawh chu sual dodaltu Thlarau Thianghlim neitu kan nihna nen a inrem lo tak meuh a. A chhan chu harhfim leh rilru fim pangngaiin a tih duh loh leh a tih theih loh thin kha, zu in a rilru leh a thluak a bual at tawh chuan pawh tihna nei lovin a tihtir leh fo thin a ni. Kan fa duatte nungchang leh

rilru tikhawlo tur thenawmten an zuar a, min lo hrai ruihsak thin hi chu kan tuar tlang a nih hi.

Tunlai hmasawmna avanga kan manganna: Tunlai finna leh thiamna lama hmasawmna chak takin min rawn thleng ve a, information leh communication lamah hma kan sawn chak hle mai. Kan hnathawhna leh eizawmnaah te, sumdawmnaah te, inkalpawhna lamah te, awlsamna nasa tak min thlen a, a lawmawm hle. Ram hla tak pawh darkar rei lo te chhungin kan thleng zung zung thei ta. Heng TV, Computer, Internet, Facebook, Mobile phone, etc. te hmang hian thil thleng leh chanchin a chhia a tha kan hmuin kan hre zung zung thei ta bawk a; tin, thu chhia, thu tha kan inhriih leh inhriattirna ber an ni. Tul bik thilah lo chuan lekhathawn sei pui pui ziah a ngai ta lo. Tin, in lam leh ram lama kut hnathawkte tan lah a tangkai em em bawk.

Mahse, heng malsawmna min thlentu tangkai takte hi thil sual tih duhte tana remchanna leh thiltih awlsamna thlentu an ni ve mek bawk. An hman sual chuan thil tha lo leh pawh tak thlentu an ni thei. Hmasawmna atana thil tha leh tangkai tak takte hi kan chhiatpui a, kan nun min run mektute an ni lawi si hi a manganthlak a ni! Heng bakah pawh kan ram Kristian nun min ei chhe mektu langsar tak nia lang chu - rualawhna te, duhamna leh mahnihmasialna te niin a lang, hei hian hlemhletna a rah chhuak fo thin. Mi rethei zawkte rap betin, mi dangte chanpual pawh an chhuhsak fo thin hi ringtu nun nen chuan a inrem lo a ni. Kan rualawhna avanga rinawmna leh dikna palzuta, mahni hmasialna avanga kan duhamna hian kan unaute lamah eng rah nge a chhuah thin le? Chu chuan kan thlarau nun engtin nge a nghawng? Sual hawtu Thlarau Thianghlim duh dan kalha kan thiltih hian thlarau nun a nghawng thin.

Sual huatna harhna kan mamawh: Pentikos nia Petera sermon aṅanga harh chhuakte khan ‘an sualzia leh an thiltih dik lohzia hriain an manganga, an sualte ngaihdam nan engtia tih tur nge’ tih an zawt a. Pathianin Thlarau Thianghlim min pek chhan hi i ngaihtuah thar ang u. A duh zawnga kan nun theihna tura min pawla, min zirtira, min kaihruai ṅintu chu Pentikos nia lo thleng, vawiina min uaptu hi a ni. Thlarau Thianghlim hi kan hlimpui tur ringawt atan min pek a ni lo va, a duh zawnga rah tlo leh tha, rah thlamuanawm tak, felna rah kan chhuah theihna tura min pek a ni. Sual huatna tel lova taksa chetna leh lam hlim mup mup chaka harhna ringawt chu kan mamawh lo, kan chang tam zozai tawhin ka hria. Kan buaina, manganna tam tak hi chu kan insiam chawp duhamna leh hlemhletna sualina a rawn thlen a ni.

Thlarau Thianghlima harhna kan beisei a, kan dil ṅhin. Kum 1984-a harhna lo thleng bak kha a hnu lamah

Zoram pum nghawng harhna kan dawng ta lo. Kum 1990 kuma El-Bethel harhna kha, Zoram pum nghawng ni lo mah se, tun hnaia a lian tham kan sawi theih chu a ni mai awm e. Lalpa hian simna tel si lova min tihharh hi a tum ta lo a ni ang. Sim hming pu tlaka kan rah theih nan kan hriat chin hi a tawk em em a ni. Hnam ang chuan Pathian thu hriatnaah hian khawvelah a ber kan ni ngei ang. Sima sual kawng hawisan turin Pathian thu hi kan hre tawk khat tawh hle, kan hriat leh kan kawl mek hi a tawk zo em em a ni; heng bak hriatna dang kan mamawhin ka hre lo. Kohhran chauh ni lo, NGO-te nen lam harhna dawn thar leh beiseiin camping/cru-sade kan uar viau lai hian Lalpan min chantir a tur chu Thlarau hi ‘sual huatna Thlarau Thianghlim’ a ni tih i zir thar ang u. Thlarau Thianghlim zara sual ngaihdamna dawngtute hian sual huatna Thlarau kan chang tih i hria ang u. Bible-in engtin nge min hrilh: “Thlarau Thianghlim chu tilungngai suh u, Tlanna ni

atan chuan amahah chhinchhiaha in awm kha” (Eph 4:30) “Thlarau chu timit suh u” (1 Thes 5:19) tiin min hrilh.

Kan سوالنا hian Thlarau a tilungngaiin, a timit thei a; chu chuan chhandam nih inhriat chianna leh hlimna a hlohtir a, ringtu nun a tidawi a, سوال hneh tura chakna, thiltih theihna a hlohtir thin.

Sual huatna Thlarau chuan kan nunah ro rel sela, a huat zawng kan pawm tlatte bansan turin a hnenah i intulut ang u. Chu chu kan thlarau tan nunna leh chakna, leh thiltihtheihna bul a ni e. Sual huatna Thlarau Thianghlim kan chan hi kan thiltihah, eizawnaah, kan hnathawhah lang rawh se.

Amen.



Kum tam tak chhung a daih ta!

Fianriala Pathian pawla ka ṭawngṭai apiangin hun kal tawha ka rinawm lohna chuan ka hmaiah tak hian minrawn beng siah zel mai a. Ka tlangval lain kan thenawm pa buhpawl ka lei a, ka tum aia a lo rih deuh avangin pek tlak nghal mai tur ka nei lo chuan 'I O U' (I lei ka ba) tih chu ka pe ta ringawt a. Ka bat ka pek tlak hmian a thi ta mai si a, roreltu hnenah kalin ka chungchang leh lei bat ka neih thu inziahna te a lo awm mial em tih ka zawt a; a lo awm bawk si lo. Ka bat chu pek lohvin a awm ta reng mai a. Tunah chuan kum 80 a upa ka lo ni ve ta, ka rinawm lohna chuan tun thleng hian chhum ang maiin min la khuh reng a, ka Lalpa lah chuan min hriat nawntir fo bawk si; ka thlarau nun pawh hi a ṭhang thei thlawt lo a ni ber e. Naktuk zingah chuan ka leibatna pa nupui hnenah ka kal ang a, ka leibat chu ka pe tla ngei ang tih ka intiam a.'

A intiamna a hlen hnu chuan a rit phurh chu a bo ta a, nun nuam leh zangkhai takin a awm thei ta a ni.

THLARAU THIANGHLIM THLAMUANTU

Johana 14:15-26

- Rev. V.L. Kroschhuanmawia

John 14:15-23 hi Thlarau Thianghlim chungchang sawina chang pawimawh tak pakhat a ni a. Lal Isuan a thih hma lawka a zirtirte hnena sawi a nih avangin a pawimawh bik riau a ni. A zirtirte a kalsan dawn khan Thlarau Thianghlim a pek tur chu eng nge a nih a hrilhfiah a. Chu thu hmanng chuan Pathian thu kan ngaihtuah ho dawn a ni.

1. Hmangaihna leh thuawihna a pawimawh hmasa (ch 5): Lal Isuan Thlarau Thianghlim a pêk tur a sawi hmain “*Nangnin mi hmangaih chuan ka thupekte in zawm ang,*” a tih hian thil pawimawh tak pahnih a keng tel.

Thlarau Thianghlim dawng turin thilung leh tih tak zeta amah kan hmangaih leh a thupêk kan zawm a duh a ni. Dietrich Bonheoffer chuan, “A thu awih chauhin an ring thei a, amah ring chauhin a thu an awih thei bawk,” a ti a ni.

Phûr chang leh rilru a khawih châng chauha hmangaih leh thu awih hi a duh tawk lo. Thinlung tak

taka hmangaih leh thu awih hi Lalpan a duh a ni. Zirtirte pawh Isua thu awiha Jerusalem chhuahsan lova pindan chungnungah amah ngai êm êma, inthuruala, rilru hmun khata an awm khawm laiin an hnenah Thlarau Thianghlim chu pêk a ni. Chu Thlarau Thianghlim chu dawng turin Thinlung taka Isua kan hmangaiha, a thu kan awih a pawimawh a ni.

2. Thlarau Thianghlim chu Pa pêk tur a ni: Lal Isuan a zirtirte chu he khawvelah hian fahraha a kalsan loh turzia sawiin, “Pa ka dil ang a, ani chuan Thlamuantu dang a pe ang che u, chatuana in hnena awm tûrin,” (ch. 16) a ti a ni. Pentikos ni a lo thlen chuan thawk leh khatan van ata ri,

thlipui tleh angin a lo thleng ta phut a. An zain Thlarau Thianghlimin an khat ta vek a ni (Tirh 2:1-4). Hlimna leh lawmnain an khat a, Pathian thu puang turin huaisenna an lo nei ta. Hun harsa leh nuamah te, lungngaih ni leh lawm niah pawha min kalsan ngai rêng rêng lo tur Thlarau Thianghlim chu Isua avangin Pain min pe ta. Chu Thlarau Thianghlim chu dawng tûra amah hmangaih leh a thu awih nih chu a pawimawh a ni.

3. Chu Thlarau Thianghlim chu eng nge a nih:

(1) *Thlarau dik tak a ni:* Vawi khat chu ringlo mi Lecturer pakhat hian a college naupangte a zirtirnaah Isua chanchin chu thawnthu ropui tak a nihzia a sawi lang a. A sawi zawh chuan a hnunga tlangval pakhat thu chuan thusawi duh a nei a ni tih entir nan a ban a phar a. Zirtirtuin sawi a phalsak hnu chuan, “Isua chanchin kha thawnthu angin i sawi a, he lai ka lo kal hma hian tlangval awm tha duh lo tak, khawlai a vâk mai mai ka ni a. Mi tam tak

chu ka nun thlak danglam tumin an lo kal thin a, tu mah an hlawhling ngai lo. Mahse, i sawi Isua kha ka tawh hnu chuan ka nun thlak danglam in a lo awm ta a, he laiah hian ka lo tel ve thei a ni. Thawnthu ngaihnawm tak a ni mai lo va, a tak tak a ni,” a ti a. Thlarau Thianghlim chu Thlarau dik tak a nih avangin thutak a hriattir a, mite chu thu takah a hruai lut thin (Jn 16:13).

(2) *Thlamuantu a ni:* Thlamuantu - Grik ÷awnga *parakletos* tih hi ÷awngkam khata a awmzia lehlin chhuah theih a ni lo. A lama ÷ang tlat tura mi koh luh tihna a ni a. Thlamuantu, sawipuitu, dinpuitu, ÷anpuitu, venghimtu, pa chanchang, palai hna thawktu, etc, tia lehlin theih vek a ni.

He thu hi ti hian i um zui hlek teh ang:

(a) *Thlamuantu nung reng a ni:* Hun harsa leh manganna hmunah pawha min kalsan ngai lo thlamuantu

a ni. Kan lungngaihna nasa tak miten min hnem theih loh lai pawhin kan thinlunga Thlarau Thianghlimin thu a sawi chuan music mawi tak ang maia ngaihnawm leh khawizu ang maia thlum a lo ni thin. Spurgeon chuan, “Vante khi teh chhuak ila tlang rih zawngte lamin, tui puia tui awm zawng zawng leh a far zât thlengin, vau kama t̄iauvut zat lam hian, i zawh hunah chuan eng anga hmangaihna nasa nge a nih i sawi thei chauh ang. A hmangaihna hi a thuiin, a thain, chatuan a daih a, a hmangaih zêl fo vang che. Amah chu nangmah thlamuantu che a ni a, i thinlung chu a lamah pe mai rawh,” a ti a ni. Ni e, i lungngaih leh mangan lai pawha hmangaihnaa thlamuantu nung reng a ni.

Thlamuantu rinawm leh fing, him leh chau ve ngai lo a ni. Kan mamawh lai taka mi hnen aṅanga thurawn kan dawnte hi a chang chuan a him lovin a fing tawk lo fo thin a. Hun harsa kan tawh veleh min hmangaihtu nia kan

hriatten min kalsan fo thin bawk. An hnena kan harsatna leh manganna sawi turin ngaithla tur leh min ṅanpui turin hun an nei tawk lo va, an chaknain a tlin lo fo thin. Thlarau Thianghlim Thlamuantu ve thung erawh hi chu eng lai pawhin a rinawm a, min thlamuan tur leh min tichak zêl turin a inpeih reng a ni. Thlarau dik tak a nih avangin a thurawn leh kaihhruaina a sual ve thei lo. Kan kalsan a nih pawhin a lam kan hawi leh hun tur chu rinawm leh dawhthei takin a lo nghak thin a ni.

Chu thlamuanna chuan tawp chin a nei ve lo. Kan tawrh chu a nasat poh leh thlamunana thukzia chu kan hmu Chiang ang. Polycarp-a (AD 70-155) pawh kha hal hlum a nih dawn thleng pawha thlamuang leh huaisen taka awmtirtu kha a ni. Hal hlum a nih loh nana a rinna phatsan tura an thlem lai pawh khan, “Kum 86 chhung a rawng ka bawl tawh a, ka tana tha lo turin eng mah a ti ngai lo. Engtin nge min chhandamtu, ka Lalpa chu ka phat theih

teh lul ang?" a ti hmiah mai a ni. Bohemian reformer John Hus-a, Bible thuneihna vuan tlattu pawh kha a rinna phatsan tura an tih khan, "Ka kain a lo puan chhuah tawh chu ka thinsenin a nemnghet dawn a ni," tiin a pian cham kum 42-naah tihlum a ni ta a. Heng mite thlamuanna leh chakna hi khawi dang aṅang maha lo kal a ni lo, Thlamuantu Thlarau Thianghlim hnathawh a ni. Amah chu kan neih phawt chuan Thlamuantu dang reng kan ngai tawh lo ve.

(b) *Min dinpuitu leh sawipuitu a ni:* Thlarau Thianghlim chu he khawvel roreltute hmaah leh Lalpa rorêlna hmaa kan tana min dinpui leh sawipuitu tur a ni. Roreltu hmaah kan din hun pawhin a ṭul ang zêla kan sawi tur min hrilhtu tur a ni a (cf. Mt 10:19).

(c) *Ṭanpuitu a ni:* Kan mamawh hun apianga min ṭanpuitu tura pek kan ni. Kan finna leh theihna a tawp hun pawha min ṭanpuitu hnai reng

a nih chu. Engtia ṭawngṭai tur nge tih pawh kan hriat loh laia rum sawi hleih theih lova min ṭawngṭaipui tlattu a ni (Rom 8:26).

(d) *Zirtirtu a ni:* Thlamuantu, Thlarau Thianghlim pek tur chuan engkim min zirtir tur thu Lal Isuan min hrilh a (Joh 14:26). Kan thlarau nuna harsatna leh kan hriat fiah thiam loh pawh min hrilhfiahtu tur, a thu thuk leh ril ropui tak pawh min hmuh fiahtirtu tur Thlarau Thianghlim a ni.

4. Thlarau Thianghlim chu kan nunah i chettir ang u:

Mi zawng zawng tana chan theih turin Thlarau Thianghlim thlamuantu hi pek a ni a. Keimahnia chettir tura hmun kan siamsak a ṭul a ni. Bucket-a tui dah khat turin a chhunga bawlhhlawh awmte kan thian fai ṭhin ang hian, chu thlarau chu kan hnena a awm theih nan keimahni kan intihfai ve a ngai a ni. Hausakna, hriselna, chakna leh dinhmun avanga pek a ni lo vang, Pathian an hmangaih

leh a thu an awih chauhin pek an ni thung ang. Chu thlamuanna chu kum sang tam ral hnu thleng pawha chuai ve ngai lo tur, ringtute nun chelh tlattu chu a ni.

Chuvangin, kan hnena chêng tur te, min zirtir tur te, kan hmuh chhuah phak rual loh thu min hrilhfiah tur tein sawm ila. Kan tawrhna

hmunah atana ding nghet tlat thei tura a tihchakna te, kan thusawi leh thiltih apiangah thu tak a lan chhuah theih nana ÷anpuina te leh finna te dil ila. Ani chuan zirtirna, finna, hriatthiamna leh muanna dik leh tlo chu min pe ngei ang.

AMEN



Apostle Johana zuitu Polycarp-a chu AD 155 khan Smurna khuaah an hal hlum a. Kum 86 chhung Krista ringtu rinawm tak a ni. Amah vengtu chuan a rinna chu phat mai turin a thlem a, Polycarp-a chuan, “Kum 86 chhung a rawng ka lo bawl tawh a, ka tana ÷ha lo turin eng mah a la ti ngai lo va, engtin nge Amah chu ka phat theih tehlul ang ni,” a ti a.

A vengtu chuan, “Sa kawlh ka sehtir mai tur che a nia,” a ti a. Polycarp-a chuan, “Han ko ta che,” a ti mai a. Hal hlum turin a vau leh a, eng mah awmzia a nei chuang lo, “Meia hal hlumah min vau maw? Rei lo tea thihna tur chauh a nih chu; Pathian hre lote chan tur chatuan meidil mit thei lova i awm hun tur hi ngaihtuah ta che,” a ti a. An hal ta a, an hal lai chuan heti hian a ÷awngtai a -

“Fapa ISUA KRISTA hmangaiha malsawmtu PATHIAN, vawiina tun darkarah hian Krista tuarna no ÷awmpuia, martar-te zinga tel ve tlaka min ruat avangin ka fak a che,” tiin.

THLEN CHIN AṬANGA HMASAWN

(Phil 3:12-16)

- K. Lalchungnungi
Upper Kanan, Aizawl

Kan thupui hi Tirhkoh Paula ṭawngkam a ni a. Philippi khuaa kohhranho leh rawngbawltute hnena a fuihna a ni a, ringtu puitling ni tura a fuihna ṭawngkam a ni. Rinna kawnga intlansiakna chu a vawrtawp a thleng mai lo va, tlan zêl tur a nih thu leh, amah ngei pawh rinna kawngah chuan puitling leh ṭhankin a nih bik lohzia leh hmabak sawn zel tur a neihzia a sawi lang a. Chanchin Ṭha hrilin kohhran eng emaw zat din tawh mah sela, hmabak a la nei zel a. Krista tana a induhthawhna a la zual zel a ni tih he lai chângah hian kan hmu. Ringtu puitling tih a khaikhawmna chu, "Eng pawh ni se, kan thlen chin aṭang khan hma i sawn zel ang u" tih hi a ni. Mizo Bible lehlin hmasaah khan, "Kan thlen chinah hian nghet takin i ding ang u" tia dah a ni a. He thu hmang hian Kohhran hmeichhiate hian rinna kawnga puitling rilru pu turin i han insangmar dawn teh ang.

Kan thlen chinah nghet takin i ding ang u; kan thlen chin chu khawi pawh ni rawh se, eng dinhmun pawh ni rawh se, rinna kawnga kan thlen chinah hian nghet takin i ding tlat ang u. Tihchet rual lohin Krista hna hi i thawk tlat ang u. Kan pasalte hmangin emaw, kan fate hmangin emaw, thil dang dang hmangin emaw Setana hian he Krista rinna kawnga kan ṭhutthleng nghet sa ni mek

hi tihchet tumin min bei fo ang. Mahse, he rinna hmunah hian nghet takin i ding tlat ang u. Chu chu ringtu puitling ni tura rahbi pawimawh hmasa a ni si a.

Kristian chungkua kan tlangaupuina hi a rei tawh hle mai. Kawng tam takah chuan a hlawh pawh kan hlawtling thawkhatin a sawi theih ang. Mahse, sual hi a chak em mai a, Kristian chungkaw kulh hi a rawn su nghing lawih

lawih fo mai. Tawngtaina hruia kan thlun beh tlat loh phei chuan a su chim thei tak ngial dawnin a lang. Nu leh pa tam tak chu kan fate khawlohna leh an chung a sual hnathawh avangin kan beidawng a ni thei e. Rila rah, fate ngei mai sualin a han man bet tlat mai hi chu a thawpik-thlak a, thinlung a rum a, bei a dawng a ni. Isua kan rinna meuh pawh a sawi nghing dawt dawt mai a ni. Mahse, Kristaah hian nghet takin i ding tlat zel ang u. Thlen chin atanga hnungtawlh lova, hma lam kan pan talh talh zawngin hma kan sawn dawn tihna a ni. Harsa mah se, sak mah se, hrehawm mah se, a man pek tlak a ni tih hriain i beidawng lo vang u.

Rinna kawngah hma i sawn zel ang u; Tirhkoh Paula meuh pawhin, "Hmu tawh reng inti ka ni lo va, famkim tawh reng inti ka ni hek lo..." a tih kha. Paula meuhin chutianga a tih chuan keini chu tan la nasa hle zawk tur kan ni. Vawiina Pathian ka rinna hi eng ang nge le, rinhlelhna hmanga

beiseina leihlawn dawh thin nge ka nih, tlakchhiat pawh huama Amah nghak thintu? Paula rinna hi kan rinna nen teh dawn ila a inthlau fu mai thei. Kan phak lo nasa ngawt ang. Ani mahin hma lam pan zel tul a tih chuan keini phei chuan ti leh zual tur kan ni ngei ang.

Kan Pathian thu lak dan leh pawm danah hma lam i pan zel ang u. A ring leh 'rau' apiang zui lovin, Pathian thutak pai chu i um zawk ang u. Kan ramah hian Pathian thu buaipui leh sawi thei kan tam ngawt mai. Hemi tluk zet hian Pathian thudik hi buaipuiin nunpui peih theuh ila kan danglam ngei ngei ang. Pathian thu hriatna lama kan than ang zelin a thu awihna lamah pawh i than tel ve ang. Biak in leh a velah chauh ringtu tha, pawn lam leh eizawna hmuna Setana thuihruai ni awm tak kan ni em? Thlarau Thianghlim crusade te kan nei a, hming ropui tak tak kan vuah a, thiam tak takin kan sawi a, kan thawm pawh a tha thei hle a, kan thatpui em? Kan ngheh phah

em? Kohhran Pathian biak inkhawm lai pawha programme siam kan hreh lo tan tial tial ta ni pawhin a lang. Kohhran huang chhung ațanga Pathian biak kan dukhawp loh hun hunah Isua hmu fiah thei lo khawpin eng rau rau emawin min bawm thuai ang tih a hlauhawm. Kohhran hi kan awmna leh kan rinna kan sawh nghehna tura Pathianin min dinsak a ni. Kohhran pawn lama hlim tum hi puarpawlang ang a ni a, a puar len zoh poh leh kehchhiat a hnaih thin. Kohhrana rinawmna kawngah hma i sawn ang u.

Kan ni tin nun thlir ila, rinawmnaah kan thlen chin ațangin hma i sawn ang; diknaah kan thlen chin ațangin hma i sawn ang; thil ța tih kawngah kan thlen chin ațangin hma i sawn ang. Kan fate kan veinaah kan thlen chin ațangin hma i sawn ang; mi dangte țanpui kawngah kan thlen chin ațangin hma i sawn zel ang u.

Hnung lama thil awmte theihnghilhin; kan thlen chin

chu eng pawh ni se, heta țang hian hma lam i pan ang. Hma lam pan tur chuan 'thawh' a ngai a, 'kal'-in a zui a ngai bawk a. Tirhkoh Paula pawhin 'he thil pakhat hi ka ti thin, hnung lama thil awmte chu theihnghilhin hma lama thil awmte chu banin' a tih kha. Krista chhanchhuahna kan chan hnu hian kan nun hlui leh sulhnu ța lo hmangin سوالين min bei fo a. Mi سوال, mi zinga awm tlak lo, Pathian pawhin a hmangaih theih tawh lo, chhe lailet der angin min inhmuhitir a tum fo. Chu chuan mahni insitna, inthlahrunna leh Pathian hnaih ngam lohna, beidawanna ruamah min hnuklut a, min indawmkuntir a, khawvel chu a thim zawng hlira min thlirtir a tum a. Chutah chuan chhiatna leh boralna kawngkaah min nam lut ta thin a ni. Nimahsela, he kan Pathian hi 'An سوالنا leh ățna te chu ka hre reng tawh lo vang' titu Pathian a ni a. Pu Lalremruata'n, "Ka sũlhnu leh nun hlui a chhui ve lo, a khawngaihna 'Amen' lo tih mai hi chatuan atan nunna a

lo ni" a tih ang khan Pathianin kan sulhnu leh nun hlui tha lote chu min theihngihlsakin min ngaidam a, hma lam thlir tura beisei kan lo ni ta. Hnung lam hawi kir chu boralna a ni thin. Kan nun hlui leh sulhnute chu eng ang pawh ni rawh se, chu lam chu hawi

lovin hma lam en ila, hma lam beiseina chu thlirin hma i sawn zel ang u.

Kan Pathian biak danah hma i sawn ang: Kohhran hmeichhiaten kan tlangaupui pakhat 'ni tin chung inkhawm' lamah hian hma i sawn zel ang u.



Mi pakhat hi Inrinni tlai tin hian khawlaia hmun pakhatah hian a ding thin a, mi lo kal apiangte chu Pathian Thu ziak a lo pe thin a. Kum 40 chhung a din hnu pawhin a sawtna reng reng a hmu si lo va, a beidawng chu a ding duh ta lo va. Kum eng emaw zat a ral hnu chuan chu hmuna a va kal leh chu a dinna thinah ngei khan tlangval pakhat hi a lo ding a, Pathian Thu ziak chu a lo pe ve a.

Putar chuan a din chilh a, "Tlangval, eng vangin nge he hmunah hian i din chu le?" a ti a.

Tlangval chuan, "Ka pu, thil awm dan chu hetiang hi a ni e: Kum tam tak chu hetah hian putar pakhat a ding thin a. Kei pawh hi Pathian Thu ziak min pek avanga piangthar ka ni. Putar chu ka hmu ngai ta lo va, Pathianin a hnenah a hruai chho tawh a nih ka ring. He hmun ruak hi luah ngei a tula ka hriat avangin a dinna thin hmunah hian keimah ka ding ve ta mai a ni," a ti a.

Tlangvalin thu a hrilh mawlh mawlh lai chuan putar chu a mittui a tla zawih zawih mai a, "Tlangval, keimah hi thu ziak petu che chu ka ni e; Pathianin min khawngaih sela, Isua Krista lo kal leh thlenga he hmuna ka din theih nan hmun hi min kian leh ta che," tiin a dil ta a.

PHAI LAMA FA DAH TURTE TANA THURAWN

- *Upa Chhawvunga*
Mission veng

Exam result a lo chhuak ang a. Nu leh pa chhungkaw hotu tam tak chuan kan fate, kan naute sikul, college kalna tur ngaihtuahin kan buai ang. Thenkhat chu technical institution lam a ni ang a, thenkhat chu zirna tluang pangngai - arts, science, commerce leh a dangte a ni ang. Thenkhat chu hna atana inbuatsaihnaate a ni ang. Hetah hian thurawn tlem han nei ila:

Nu leh pa leh naute, phai lama tir duh chuan an awmna turah Evangelical Union (EU) a awm em tih ngaihtuah ni thei sela, a that ka ring hle mai. EU chu zirlaite zinga Pathian thu theh darh tum pawl, Lal Isua la hmu lote hnena Chanchin Tha hril tum pawl inhlawmkhawm an ni. India ramah hian khawpui eng emaw zatah an awm. Shillong-ah EU, (Shillong Inter-Collegiate Evangelical Union (SICEU) an awm a. Hmun hnihah inkhawmna tha tak tak, kohhran inkhawm banah an nei thin. Guwahati, Kolkata leh India ram khawpui tam takah EU hi a awm a. EU-a tel hi a hlawk a, a that dan a dawbawl - Pathian lama min kaihruaitu atan a tha em em a, tawng zir nan a tha em em bawk!

Hetianga kan fate, kan naute tana ngaihtuahna kan sen chuan min pui thei turin Aizawlah Evangelical Graduate Fellowship a awm a, College hrang hranga EU a awm nual bawk. Aizawl pawn lam atanga lo kal te, Aizawl rawn pante tan EU awmna college a awm a, MSEU awmna college a awm bawk. EU hi UEIS an tih Union Evangelical Student of India hnuaia mi a ni a, MSEU hi Mizoram Student Evangelical Union a ni a, hei hi tualto zirlai Kristian pawl pakhat a ni. He pawl pahnihte tum chu zirlaite Krista hnena hruai leh A tana rinawm tura tanpui ti ila, a tawi thei angin a tha mai awm e.

EU-ah hian Bible zir hona tha tak an nei thin a, kum tin

Discipleship Training Camp te neih a ni bawk thin. Chu bakah, an thiante hnena Lal Isua chanchin hrilha, an pianthar theihna tura puih hi an ngai pawimawh em em a. Rilru leh tih tak zeta EU-a inhmangte hi an zirlaiah pawh an ti tha tlangpui a, Pathian duh zawng tak inzirtirna a nih vang a ni ang. Tin, Synod-in Campus Ministry lamah hma a la ta bawk a. Hei nen hian a inchawm tawn zel chuan a la hlawk leh zual dawn a ni. 'India ramah Lal Isua thlen in a vang' kan ti a, EU rawngbawl na hi chu thlen in siam tura kawng tha ber leh hlawk ber pakhat a ni tih hi tunah hian a lang Chiang Mek. Kan naute leh kan fate an tel ve a nih chuan kan hlauhthawn leh harsatna kan tawh eng emawte hi kan pumpelth thei dawn a ni.

EU thil tum bulpui ber chu college zirlaite hnena Lal Isua Chanchin Tha hril hi a ni a. Hei hian thu sawi mai bakah mi mal nun, a lang lo lamah leh a lang lamah Lal Isua tana thuhretu, witness nih a ni. Hei hian hun fianriala Pathian

pawl leh tawngtai te, Bible zir ho te, Lal Isua tana mi tangkai ni tura infuih te, kohhran mi tangkai nih te, kan zirlai tha tak leh thiam taka zir dan te, a ni a. Nupui pasal zawn dan leh zir zawh hnua hna ngaihtuah chungchangte leh ram pum pui huapa ram tana tangkaina neih vena tur te, national conscience thlenga ngaihtuahna leh tangkaina chungchang sawi leh chung atana infuihna leh intanpuina thlengin a huamin a hma a ni.

He pawl hian a ngaih pawimawh tak mai pakhat chu kohhran dah pawimawh a ni. EU member chu an lawina kohhranah chhawr tlak, tangkai leh a theih ang tawka kohhran ngai pawimawh mi nih a ni. Para Church pawl pakhat ni ve mai lo va, kohhranin a tangkaipui, kohhran tihmasawntu nih hi a tum leh a duh chu a ni. Tun hnaia an programme duan pakhat chu EU leh kohhran inlaichinna chungchanga hma lak a ni a, kohhran tihsawt hi EU chuan a ngai pawimawh hle.

Tunlai thalaite zingah thlemna leh harsatna chi hrang hrang a tam hle a. Hengah hian EU chu Campus Ministry tan tanpuitu leh tisawttu nasa tak a ni thei. Chuvangin, kan fate, kan naute hi Campus Ministry rawngbawlnaa inhmang tangkai tur leh chhawr tura kan fuih a tul hle mai. State dangah chuan kohhran a chak tawk loh fo avangin EU hi a pawimawhin a tangkai em em a. Kan ramah erawh chuan kohhran a chak a, thalaite rawngbawlna a that em avangin campus ministry hnuaiah hian KTP leh EU hi inpawh tak leh thuhmun ang deuhthawa kal dun theih a ni. Campus ministry-ah hian mi mal harsatna hi helpline hmanga luhchilh a awl lehzual.

Chuvangin, nu leh paten kan fate zirna hmun tur kan ngaihtuah hian he lam pawh hi ngaihtuah tel a tha. Programme a inang vek lo va, hetiang deuh hian hun an hmang tlangpui thin:

1. Mahni awmna hostel-ah, hostel-a awmte tan hun remchangah nghet takin Bible zir hona leh tanngtaina hona an nei thin

2. Pathiannah emaw, remchang dangah emaw inkhawmna, fellowship leh thusawinate an nei thin.

3. A remchan dan angin evangelistic meeting an siam a, chutah chuan la piangthar lo leh la ring ve lote an sawm a, Chanchin Tha an hrilh thin.

4. Zirlai chungchangah infuih tawna leh inrawn hona hun an siam thin.

5. Chawlh laiin camp-te neiin hun an hmang thin. Hei hi Kristian nun leh mi mal harsatna leh manganna chungchangah infuihna tha tak a ni.

6. Mahnia hun fianrial neiha, Pathian pawlna mumal tak neih hi hi an ngai pawimawh hle a, an infuihna pui pakhat a ni.



Bible hi chelh reng la, ani pawhin a chelh reng ang che.

-W.H. Houghton

HMANGAIHNA IN TANA THILPEKTE (HMANGAIHNA INA DAWN)

1. Lalramtanpuii, Electric Veng	₹ 1,500
2. Chhing Veng Bial K.T.P	₹ 5,000
3. Bawngkawn East Kohhran Hmeichhia	₹ 6,000
4. Kolosib Project Veng Koh. Hmeichhia	₹ 1,800
5. Zorinpuii d/o H.Zonunsanga, Durtlang	₹ 1,500
6. Lalthan siami, Leitan	₹ 1,000
7. Mawitei c/o Josefa	₹ 500
8. Roseia, Hunthar Veng	₹ 1,000
9. C. Saikunga, Ramhlun North	₹ 1,500
10. Pi Zokhumi Vankung, Zarkawt	₹ 1,000
& Thawmhnaw	
11. Bawngkawn Hmar Veng Koh. Hmeichhia	₹12,000
12. Maubuang Kohhran Hmeichhia	₹ 7,000
13. Zote South Kohhran Hmeichhia	₹ 1,000
14. M.H.I.P.	₹ 1,000
15. Buhban Kohhran Hmeichhia	₹ 2,000
16. Lal̄tanpuii, Jowai	₹ 1,000
17. Darchhunnguri, Tanhril	₹ 1,000
18. Chawnpui Bial K.T.P.	₹10,000
19. Lalzawmliani, Zemabawk North	T. Shirt
20. Lalchhantluanga	₹ 1,000
21. Zonuam Bial Kohhran Hmeichhia	₹18,000
22. Serchhip Bazar Kohhran Hmeichhia	₹ 6,000
23. Lallen Bial Hmeichhia	₹ 5,000
24. Serchhip Dinthar Kohhran Hmeichhia	₹ 6,000
25. Bairabi North Kohhran Hmeichhia	₹ 5,000
26. Serchhip Vengchung Kohhran Hmeichhia	₹ 6,000
27. Haulawng Bial Hmeichhia	₹ 1,000
28. Serchhip Vengchung Bial Hmeichhia	₹ 5,000

29. Hnahthial Bial Kohhran Hmeichhia	₹ 2,000
30. Ngopa Bial Kohhran Hmeichhia	₹ 9,340
31. Phuldungsei Bial Hmeichhia Buhfai bag &	₹ 3,000
32. Phulbial Kohhran Hmeichhia	₹ 3,000
33. Tuidam Kohhran Hmeichhia	₹ 5,000
34. Tuipang Bial Kohhran Hmeichhia	₹ 1,000
35. Khatla North Branch K.T.P.	₹ 4,500
36. Samuel Lalawmpuia & Lalbiakzama, Leitan Thawmhnaw & ei tur	
37. Bawihpuii & P.C.A, Ramhlun North	Ei tur
38. English Congregation School, Mission Veng	Toys & ei tur, etc.
39. Bungkawn Koh. Sakrament Dept. Artui &	₹ 2,100
40. Sihphir Vengthar Bial Hmeichhia	₹ 3,600
41. Zoliana Kawlni, Durtlang North	₹ 500
42. Khawbung Bial Hmeichhia	₹ 2,000
43. B & L Hostel, Chaltlang	Ei tur & ₹ 2,500
44. Learner Hostel, Mission Veng	Ei tur & ₹ 600
45. Chawnpui Koh. Sakrament	Ei tur & ₹ 2,000
46. Mission Veng Koh. Sakramen Toys, etc &	₹ 5,035
47. Zothansangi, Chekawn	₹ 100
48. K. Thanthuami, Chekawn	₹ 100
49. Lianmawii, Khawlailung	₹ 100
50. Lalremsangi, Venchengpui	₹ 100
51. Dr. Rualthankhuma	₹ 500
52. Vaivakawn Koh. V.B.S.	Ei tur & ₹ 7,035
53. N.C.C.I.	₹ 3,000
54. Luangmual West Sakrament	₹ 3,190
55. Rengdil Bial Hmeichhia	Hmunphiah

Heng thilpekte hi January leh March thla inkara Hmangaihna Ina dawn a ni a. Thil petute zawng zawng chungah lawm thu kan sawi a, Lalpan a let tam takin rul leh theuh che u rawh se.

LALPA REMRUAT

Vawi khat chu Pathian ring tlat mai hi a zin a; Bible zial, bati leh arpa chauh a zinnaah chuan a keng a. Zannah chuan bati a chhi a, Bible zial chu a phelha a chhiar thin a; zingah chuan a arpa khuangin a kai tho thin. Tlai khat chu khaw te tak têah hian a va lut a. In tinah chuan thlen a dil zel a, tu mahin an lo thleng duh lo mai ni lovin, jawngkam chhe tinrenga ankhum chungin an lo hnar zel mai a.

Chu Pathian mi chuan, “Pathian khawngaihna leh dikna chuan a tha zawngin engkim a kaltir zel e,” tiin daipawn lam a pan ta a. Thingbuk hnuai belin awmhmun a khuar a, a arpa chu a kiang hnai thingah a fuktir a; Pathian hnena lawm thu sawi chungin bati a chhi a, a Bible zial chu a chhiar tan leh ta a. Thli a lo thawk a, a bati chu a rawn chhem hlum ta daih mai a, han chhit lehna chi ziazang lah a ni hek lo.

Pathian mi chuan, “Pathian khawngaihna leh dikna chuan a tha zawngin engkim a kaltir zel e,” tiin mut zai a rel ta a. A han mu a, khua a lo thim chuan sihal an lo chhuak a, a arpa chu an rawn laksak ta daih mai a. Pathian mi chuan a uin pawiti hle mah se, “Pathian khawngaihna leh dikna chuan a tha zawngin engkim a kaltir zel e,” tiin a mutsan a, tui takin a muhil leh ta a.

Zing khua a lo var chuan a tho va, a Bible pawm chungin a chungah zahngaihna lantir duh lote khuaah chuan a va lut leh a. Zan lamah chuan mi sual rualin chu khua chu an lo rawk a, mi an hmuh zawng zawng thatin khua pawh chu an lo hal ral vek mai a. Pathian mi chuan, khuaa mite khan a chungah ngilneihna lo lantir ta sela chuan an rualin a thi ve dawn a ni tih te, a bati kha lo eng ta se, a arpa kha khuang bawh sela chuan mi sualte khan amah pawh chu an that ve ngei dawn a ni tih te a ngaihtuah chhuak a.

“Pathian khawngaihna leh dikna chuan a tha zawngin engkim a kaltir zel a ni,” tiin ni engah chuan a Bible a chhiar a, Pathian hnenah lawm thu sawiin a jawngtai leh ta a.

Ei siam dan

CHICKEN CORN SOUP

(Arsa leh Vaimim Soup)

Telh turte -

1. Ar pum : 1
2. Vaimin : Vaimim kawm hnih meh thlak a, chhum emaw, Sweetcorn 1 emaw
3. White Sauce : No 2
4. Thingmarcha : Tlem
5. Chi : Tlem
6. Artui : pum 2
7. Purunsen, Sawhthing, chi

A siam dan -

1. Ar sa chu lian deuh takin chan la, tui no 8 vel telh la, purunsen leh sawhthing hraw tak taka chan thlak la, a hmin thlengin chhum rawh.
2. Arsa chhum chu a hmin hnuah a tui chu thlit chhuah tur a ni.
3. Arsa tuiah chuan vaimim emaw, sweetcorn 1 emaw chu telh la, minute nga vel chhum ang che.
4. Ar âwm ti tha laite kha te tak tein chan sawm la, sa tuiah chuan telh ang che.
5. White Sauce telh la, suan dawn tepah artui chawh sa chu thingpuife thlitna hmangin telh la, suan nghal ang che.
6. Chilli Sauce te, Capsico te leh devil sauce-te nen pawh hawp theih a ni.
7. A tak lehzual duh chuan artui hmin taka chhum chan nawi a, telh leh tur a ni.

*Hruaitute chanchin***PI LALBIAKI**

Pi Lalbiaki hi Pu Zatlunga (L) leh Pi Chuaubangi (L) te fa palina niin pianpui unau 7 a nei a, Kulikawna seilian a ni. February ni 11, 1966-ah Upa V. Neihkung a nen Dawrpui Biak inah an innei a, fapa 5 neiin tunah hian tu 12 an nei a, Chanmari vengah an cheng mek a ni.

Eizawna lamah chuan Primary School-ah Headmistress a ni thin a, tunah chuan Voluntary Retirement-in a chawl tawh a ni.

Kum 1991 atangin tualchhung kohhran hmeichhe committee-ah a tel tan a, Treasurer, Secretary, Asst. Secretary, Finance Secretary te a lo ni tawh a. Kum 1993-ah Bial Com. Member a ni a, Bial Buhfaitham Ziaktu,

Treasurer mawhphurhna te a lo chelh tawh a, tunah hian Finance Secretary a ni.

Tualchhung Kohhranah chuan Social Front Committee Member leh Meitei Kristian Fellowship Committee Member ni tawhin, tuna a chelh mek chu Puitling Sunday School zirtirtu, Inrinni zan thuhritu, Ramthar Committee Member leh Kristian Chhungkaw Committee Member a ni.

Khawtlang lamah chuan MHIP Hqrs.-ah Executive Com. Member-ah hun eng emaw chen awm tawhin, an Branch-ah President leh Secretary hnate a chelh tawh bawk.

Bible chang a ngainat zual te chu - Sam 46:1; Sam 73:28; 1 Korinth 1:30-31 a ni a. A hla duhte zinga mi chu KHB No. 45-na "*A hmangaihnaa ka chawhlin ka Pa'n min hre tawh*" tih leh KHB No. 432-na "*Khawngaihna mak mawi leh duhawm*" tihte hi a ni.

'Kan tu leh fate hi Pathian ta an nih angin, Pathian tan tawngtainain i humhalh tlat ang u,' tiin Zoram nute min chah a ni.

Hriat atan

1. Heng hmuahnte hian Leadership Training leh Kristian chhungkaw campaign neih a ni a, Pathian hruainain tluang takin hun an hmang:

* Dt. 28-31/3/2014 khan Chawngtlai Bial-ah Pi Rochhungi, Pi Lalsiammawii leh Pi C. Zopari te an kal.

* Dt. 29-31/3/2014 khan Sairang Bialah Pi Lalthansangi, Pi P.C. Nuzawni leh Pi Lalpianthangi te an kal.

* Dt. 11-14/4/2014 khan heng bialahte hian an kal bawk:

- Bilkhawthlir Bialah Pi Laltlanmawii, Ex-Chairman, Pi Rosangpuii leh Pi Lalfeli te an kal.

- Kolasib Hmar veng Bialah Pi Lalrindiki, Pi Lalhmingmawii Sailo leh Pi Lalbiaki te an kal.

- Hortoki Bialah Pi C. Lalrinliani, Pi Rallianthangi leh Pi Zothanpari te an kal.

* Dt. 12/4/2014 Sihphir Vengthar Bialah Pi Rochuangkimi, Vice Chairman, leh Pi Sailuti te an kal.

2. NEICCWA 11th Biennial Assembly cum Seminar:

Dt. 3-6.4.2014 chhung khan Presbyterian Kohhran Hmeichhia, Mizoram Synod-in Mission Veng Biak Inah a thleng a. Thupui 'Be transformed' (Rom 12:2) tih chu mi hrang hrangin an sawi a. Seminar-ah hian 'Strategy to create awareness on crime against women in North East Region' tih thupui hmangin Pi Lalthangpuii Pulamte-in paper a present a. Tuk tin Bible Study neih a ni a, 'Mari Magdalini' chanchin zir ho thin a ni. Palai 420 vel an kal thei a. Hruaitu inthlan thar a ni a, kum 2014-2017 chhunga NEICCWA President atan Pi Larinkimi, Co-ordinator, MSSU, Mizoram Synod chu thlan a ni.


Mission Veng Kohhran hian mikhual thlen thuah leh inkhawmpui buaipui thuah an zo hle mai a, an inpekna a ropuini a lawmawm hle a, an chungah kan lawm hle a ni.

DECLARATION

1. Title of News paper : AGAPE
2. Language in which it is published : Mizo
3. Periodical of its publication : Monthly
4. Printer's name : Upa R. Lalmalsawma
Nationality : Indian
5. Publisher name : Rev. Lalramliana Pachuau
Whether a citizen of India : Yes
Address : Synod Office
6. Place of publication : Mission veng, Aizawl
7. Editor's name : Lalfakmawii
Address : Synod Office
8. Owner's name : AGAPE Association
Where printing is conducted and premises on which the press in installed : Synod Press
Mission veng. Aizawl
9. Name & address of individual who owns the news paper and partners or shareholder holding more than one percent of the total capital : Nil

I, Rev. Lalramliana Pachuau, hereby declare that the particulars given above are true to the best of my knowledge and belief

Dated, Aizawl
the 2nd June, 2014


(REV. LALRAMLIANA PACHUAU)
Signature of publisher

KUM 2013-2015 INKHAWMPUI LIAN HRUAITUTE

Chairman	:	Pi C. Lalmangaihi
Vice Chairman	:	Pi Rochuangkimi
Gen. Secretary	:	Pi H. Lalpianthangi
Asst. Secretary	:	Dr. Vanlalhruaii
Treasurer	:	Pi C. Lalneihthangi
Fin. Secretary	:	Pi Vanlaltluangi

Committee Member-te

- | | |
|---------------------------|---------------------------|
| 1. Pi K. Lalthangmawii | 2. Pi C. Lalrinliani |
| 3. Pi Parchhuaki | 4. Pi Ramngaihsangi |
| 5. Pi Laltlanthangi | 6. Pi Rosangpuii |
| 7. Pi Rochhungi | 8. Pi Lalthansangi |
| 9. Pi Zohmachhuani | 10. Pi H. Kapthangi |
| 11. Pi Lalrinzuali | 12. Pi Lalrindiki |
| 13. Pi B. Zomawithangi | 14. Pi C. Romawii |
| 15. Pi Lalsiammawii | 16. Pi C. Zopari |
| 17. Pi R. Rengkhumi | 18. Pi Tlangmawii |
| 19. Pi Lalmingmawii Sailo | 20. Pi Zothanpari |
| 21. Pi Rallianthangi | 22. Pi Maria Lalchhanhimi |
| 23. Pi Vanlalhruaii | 24. Pi P.C. Nuzawni |
| 25. Pi Lalpianthangi | 26. Pi Sailuti |
| 27. Pi K. Vanlallawmi | 28. Pi Lalbiakengi |
| 29. Pi C. Chawngpuii | 30. Pi Vanrammawii |
| 31. Pi Liankimi | 32. Pi Lalrokimi |
| 33. Pi Lalbiaki | 34. Pi Lalfeli |

Ex-Officio Member-te

1. Rev. K. Lalmuchhuaka, Synod Moderator
2. Upa H. Zoliana, Synod Secretary (Sr.)
3. Rev. Lalramliana Pachuau, Executive Secretary i/c Women
4. Pi Laltlanmawii, Ex-Chairman
5. Pi Lalfakmawii, Co-ordinator

KOHRAN HMEICHHIA

Thupui : Thuhretu atana koh (Tirh. 1:8)

- Din chhan:**
1. Kohhran pum rawngbawlna tihlawhtling tura thawhho.
 2. Kristian chhungkua din nghehtir tura tan lak.
 3. Tanpui ngaite Krista hminga tanpui.
 4. Chanchin Tha puan darh.



Postal Regn. No. MZR/ 53/ 2012 - 2014 RNI Regn. 40876/ 88



Teikhang Bial Kohhran Hmeichhe Inkhawmpui



Sihphir Vengthar Bial Leadership training



Kolasib Hmarveng Bial Leadership training leh Kristian Chhungkaw campaign

To

Published by Rev. Lalramliana Pachuau, Aizawl - Mizoram On behalf of Agape Association.
Printed at Synod Press, Mission Veng, Aizawl - 796001 Copies - 40,300
www.MIZORAMSYNOD.org